

**Sagi tə, Polə nə púpúní v pa  
Galasi  
Kərisə lià tə nə  
Galasi tián sagi tə yuu wa  
sugv**

*Lìu tə, v nə púpúní sagi kv tə*  
Ku yi \*tontovv Polə nə púpúní kv.

*Lìa tə nə, Polə nə púpúní*  
Polə púpúní sagi kv tə v pa \*Kərisə lià púlí  
kapovv nə, tə nə wulə Galasi nagwanaa tə wa, v  
nə dıga tə dèń.

*Sagi tə wa sugv*  
Polə púpúní \*Zwifə-ba karnyına-ba yırı, ba yà  
nə twi v viru kwa nə, ba gugurə \*Kərisə lià púlí  
tə də ba kàrà tə, ba yà nə ba pià, sə ba twá  
suywánú tə nii nə. Polə kwè Kərisə lià tə, sə ba  
dàn ká twá ba kàrà tə nə. Ba mù yà pià, sə ba  
\*gwəŋə Kərisə lià bara tə, ba nə tà Zwifə-ba, ba  
ga zílí Yu \*nii tə mama, v nə pın \*Moyizə nə. Ku  
tə nə súpí lá, ba mù Kərisə lià tə, ba nə tà Zwifə-  
ba, də wa lià duən yà tə twá ba yofwamınan tə  
nə, ndə lià tə nə, ba nə yèri Zwezi-Kərisə.

Polə pià v bıri ba, sə ba lwarı də, kv nə zıgı  
máná tə wa, Zwezi-Kərisə nə tıga dagarv tə yuu  
wa, nə kúbú tà Yu \*nii tə, v nə pın \*Moyizə nə, nə  
kəni nəba cwəŋə wa. Nə dǎń tı nə tián. Kərisə  
liù tə, v nə tı v tián cígá cígá, kv yi Yu-\*Siŋu tə

wulə də wá, ɔ ga yá ɔ tián ɔ pa ku Siŋu təntə  
nə, sə ku kə wá cwəŋə wa.

*Polə jònì Galasi Kərisə lià tə  
(Romə tián 1.1-2)*

<sup>1</sup> À mù Polə nə púpúní sagi ku tə, à pɪn \*Kərisə  
lià púló tə nə, tə nə wulə Galasi nagwanaa tə wa.  
À yi Zwezi-Kərisə \*təntəntə. Ku tà ləzoni nə pɪn  
nii nə. Ku yi Zwezi-Kərisə də nə nyɪna Yɪ, ɔ nə  
bwin wá, ɔ lɪ tián wa, nə tún nə, sə à ya təntəntə.  
<sup>2</sup> À mù də lià tə mama, ba nə yi à nubɪa Kərisə  
yɪri, ba nə wulə à con, jònì aba. <sup>3</sup> Nə nyɪna Yɪ də  
nə \*Yuu-Tiu Zwezi-Kərisə nə wá fwa pubwanɔ á  
yɪra, ba ga pa aba bɪcan sɪó. <sup>4</sup> Zwezi-Kərisə sɛe,  
ɔ tɪ nə yuu yɪri, sə ɔ ma jon nəba nə cɔna wa. Ʋ  
dàń van nəba, ɔ lɪ síún lɔɔ ku tə yokukwɪnan tə  
jìàn wa. Ʋ fwa ku nətɔ, ɔ pa ku tə, nə nyɪna Yɪ  
yà nə pìà, nii sú. <sup>5</sup> Nə pɪan dun Yɪ nə, máńá də  
máńá, ku nə ba zwèe! Amɪna!

*Yɪ suywáńú tə yi nədv  
(Galasi tián 3.1-5; 4.9-20; 5.1-12)*

<sup>6</sup> Yɪ yi ɔ twá Zwezi-\*Kərisə nə, ɔ kúrí aba də  
pubwanɔ. Ku mù nə pɪn, ku gwárí nə zənzən  
də, nətɔ tə, á nə vəvəri lala, á yá Yɪ, á pìi á twá  
suywáńú don nə. <sup>7</sup> Cígá mama, ku tà suywáńú  
don wulə, ku súrí Zwezi-Kərisə suywáńú tə nə.  
Yá lià duən dàń nə wulə, ba nə kəni yìèn gurə  
gurə á bɪcanɪ wa, ba ga pìà, sə ba lwàń Zwezi-  
Kərisə suywáńú tə.

<sup>8</sup> Yá liù don dàń nə swìn suywáńú don, ɔ bɪri  
aba, ku nə tà Zwezi-Kərisə suywáńú tə, nə nə

swìn nè biri aba, sè Yui cùgò ku tíú. Dè ku nè swè, ku yi nè tètè wa liù, nè à yèé \*malika, ka nè nan yui ka cú, sè Yui cùgò ku tíú. <sup>9</sup> Nè dí yáá, nè swìn ku, yá nè tè kùè píi nè bwé ku wa síún nè. Liù don nè swìn suywánú don, v biri aba, ku nè tà Zwezi-Kèrisè suywánú tè, á nè nì, sè Yui cùgò ku tíú.

<sup>10</sup> À nè swìn nètù, ku tà à pià, sè lèzoni bu à nè, ku yi à pià, sè Yui nè bu à nè. À ba pià, sè lèzoni nè sóní nè. Dè à yà nè pià, sè lèzoni nè sóní nè, à yà bá ya Zwezi-Kèrisè tütùnú.

*Yui kúrí Polè, sè v ya v tvtònv  
(Tvtònan 22.3-16; 26.9-20; 9.1-20, 23-30)*

<sup>11</sup> À nubia-ba, à pià, sè á lwarì dè, Zwezi-Kèrisè suywánú tè, à nè swìn à biri tè, wà lèzoni con nan. <sup>12</sup> Ku ma tà lèzwèné nè swìn ku suywánú tètè, v biri nè. Ku ma kùè tà lèzwèné nè kàrì nè ku kàrà. Ku yi Zwezi-Kèrisè tètè nè biri ku nè. <sup>13</sup> Á yà dí yáá, á nì à tvtòné yà nè yi nètù, máná tè wa, à yà nè wulè \*Zwifè-ba yijuncwèné tè wa. Ku máná tètè wa, à yà kèni càn Kèrisè lià púló tè nè zènzèn, à ga pià, sè à pa tè nyu lá. <sup>14</sup> À mù dè à duèn tián Zwifè-ba, nè yà nè wulè nè nyina-ba yijuncwèné tètè wa, à mù yà nè zilí yìèn tè mama nii zènzèn, à doni à duèn tián tè zòni. À yà ken à pubwà mama, nè nyina-ba yofwamìnan tè nè dè yawala. <sup>15</sup> Ku yi nètù, yá Yui yà dí yáá, v kúrí nè v tún, dè à nuu tè wà nè luri. Yá máná nè yí, sè à tún à pa wá, v fwa pubwanv à yira, <sup>16</sup> v pa à lwarì v biú tè à waa con, sè à dàí swìn v yoo, à biri lià tè

də, ba nə tà Zwifə-ba. Kɔ máŋá tɛntə wa, à wà liù bwe, sə ɔ kàrì nə kɔ tə, à nə mɛ, sə à pa kɔ cígá. <sup>17</sup> À ma kùò wà \*Zwerizalemə vɛli, sə à na là tə, ba nə dí à yáá, ba yɪ \*tɔntɔna tə də. Kɔ máŋá tɛntə tətə wa, à vɛli Arabi nagwanaa. À vɛli tɛntə kwa nə, à pìí à bà Damasə.

<sup>18</sup> Kɔ buna batwa nii nə, à dàń vɛli Zwerizalemə, sə à lwarɪ Sefasə\*, yá à dàń yɪn ɔ con dian fugə də bonu. <sup>19</sup> Yá à dàń nə wà tɔntɔna tə liù don mama nɪ, də kɔ nə tà Zwakə, ɔ nə yɪ \*Yuu-Tiu nyánú. <sup>20</sup> Yɪ yèé də, yoo kɔ tə, à púpúní bwálí kɔ tə wa, yɪ cígá, kɔ tà kunkun à kɔnɪ.

<sup>21</sup> Kɔ kwa nə, à nan Zwerizalemə nə, à va à twá lá, à jírí Siri nagwanaa tə, də Silisi lɔɔ nii tə wa. <sup>22</sup> Kərisə là púló tə, ba yà nə wulə Zwide nagwanaa tə wa, yà tə wà nə nɪ ba yíá wa. <sup>23</sup> Ba yà yɪ à yoo nə, ba nèn də, là swìn, ba wú: «Bɛɛ tə, ɔ yà nə fɪfɪn nəba dàń yɪ Zwezi-Kərisə suywáŋú tə, ɔ swìn ɔ bɪrɪ síún nə. Yá ɔ mù yà ga nə pìà, sə ɔ pa kɔ suywáŋú tɛntə nyɔ lá». <sup>24</sup> Kɔ nɛtɔ dàń pɪn, ba bwɪ Yɪ nə, à mù yɪrɪ.

## 2

*Polə jəri Zwezi-Kərisə tɔntɔna Zwerizalemə nə*  
(*Tɔtɔnan 15.1-29*)

<sup>1</sup> Buna fugə də banɪa nii nə, à mù də Barənabasə pìí nə va \*Zwerizalemə. À jɪn Titə, də à kə lá, à ja va. <sup>2</sup> Yɪ yà bɪrɪ nə də, à mɛ, sə à

---

\* **1:18** 1.18 Sefasə yà jə yɪrɪ don, ba nə boŋə Piyerə.

va lá. Yá máǵá tē, nē dān nē vǝli nē yí lá, à mù dē \*Kǝrisē lià púlí yáá tián tē nan kwa, nē na duēn nē cɪcɪ. À dān ma man suywǎǵú tē dēǵ, à nē swìn à bɪrɪ lià tē nē, ba nē tà \*Zwifē-ba. À yà ba pià, sē tutuŋɪ tē, à nē tun, dē tutuŋɪ tē, à nē tuŋa síún nē, jì tutu. <sup>3</sup> Titē yà yɪ \*Gǝrɛkē, v mù yà ga nē yɪ à twadon. Yá Kǝrisē lià púlí yáá tián tē wà wá kálú, sē ba pa v \*gwǝŋǝ wá. <sup>4</sup> Yá lià duēn dē dān yɪn lá nē, ba nē yɪ kɔnkɔn lià, ba nē yɪ nē nubɪa Kǝrisē yɪrɪ. Ba mù lià tǝntǝ dān sǝǵǝ, ba zv nē púlí tē wa, ba swìn dē, Titē mɛ, sē v pa ba gwǝŋǝ wá. Ba mù lià tǝntǝ yɪ, ba zva nē púlí tē wa, sē ba ma na, nē nē twá dē Zwezi-Kǝrisē, nē ma tɪ nē tián nǝtu. Ba pià, sē nē tē pií nē twá Yɪ \*nii tē nē, v nē pɪn \*Moyizē nē dē dián. <sup>5</sup> Nē dān nē wà sǝē, nē twá lià tǝntǝ pubuŋa tē nē, máǵá mancɪn tǝtǝ. Nē mù ba pià, sē ba cùǵù Zwezi-Kǝrisē suywǎǵú tē, kv nē yɪ cíǵá cɪcɪ. Nē pià, sē nē cì suywǎǵú tǝntǝ dē kv cíǵá tē nē, nē pa aba, ba dān ká lwǎn kv. <sup>6</sup> Máǵá tē, à nē tún à nii, à bɪrɪ Kǝrisē lià púlé yáá tián tē, ba wà swìn dē, yoo mùrɪ Zwezi-Kǝrisē suywǎǵú tē wa, à nē swìn à bɪrɪ lià tē nē. À mù con, à yǝé dē, Yɪ ba lià kúrɪ, v ma kwani ba duēn. Kv mù nē pɪn, lià tǝntǝ nē yɪ Kǝrisē lià púlí tē yáá tián, nē à yǝé ba nē tà yáá tián, kv ba dēǵ jǝ kv pa à mù nē. <sup>7</sup> Yá ba mù lià tǝntǝ dān yǝni dē, kv yɪ Yɪ nē pɪn nē suywǎǵú tē, à nē bɪrɪ lià tē, ba nē tà Zwifē-ba, ndǝ v nē dí yáá, v pa nii Piyerē nē, sē v va v swìn kv, v bɪrɪ Zwifē-ba nē. <sup>8</sup> Yɪ nē tun Piyerē pubuŋa wa, sē v va Zwifē-ba con. U mù

nə kúù tún à də pubuŋa wa, sə à va lià tə con, ba nə tà Zwifə-ba. <sup>9</sup> Lià yà ywàŋá Zwakə də Sefasə\* də Zwan ndə diè tətəŋi baŋi nə Kərisə lià púlí tə wa. Ba lià batwa təntə dàń nı də, Yı cígá pın nə ku tutuŋi təntə v pubwanv tə yırı. Ba dàń jın à mù də Barənasə jıın nə, ba zuzugv, sə ku bırı də, nə mù də ba mù yı nımarv nədv lià. Nə mù dàń mə, sə nə va lià tə con, ba nə tà Zwifə-ba, sə ba də ga va Zwifə-ba con. <sup>10</sup> Yoo nədv cıci nə ba lòrì nəba, sə nə fwa. Ku mù nə yı, sə nə san ba Kərisə lià púló tə nə, tə nə yı zıra. Yá mə ku mù nə, à də yà pìà, sə à tún də yawala.

*Polə caga Piyerə nii nə Antıvswə nə  
(Tıtvnan 11.1-17; 15.7-11)*

<sup>11</sup> Ku kwa nə, Sefasə† twi Antıvswə wa. À dàń ma caga v nii nə lià tə mama yáá con, yolwan tə yırı, v nə fwa. <sup>12</sup> Ku yı cígá, máŋá don yın lá, Sefasə də \*Kərisə lià tə, ba nə tà \*Zwifə-ba, yà dé wodiu duən nə. Yá máŋá tə wa, lià duən nə nan Zwakə con, ba bà Sefasə con, v dàń lı v tián Kərisə lià tə, ba nə tà Zwifə-ba yıra, v kúù ba wodiu dé də ba, v yà nə dəri Zwifə-ba fən, ba yà nə kálí, sə bæε mama \*gwəŋə tə yırı. <sup>13</sup> Kərisə lià tə duən tə mama, ba nə yın lá, ba nə yı Zwifə-ba, də jigə níó bələ tián ndə Sefasə nə. Barənasə də tətə jigə níó bələ tíú, ndə ba nə. <sup>14</sup> À dàń nə nı də, ba təló Zwezi-Kərisə soywáŋú tə cígá tə wa, à swın Sefasə con lià tə mama yáá con, à wú: «N yı Zwifə, yá n yà ja n tián, n ma

\* **2:9** 2.9 Sefasə yà jə yırı don, ba nə boŋə Piyerə. † **2:11** 2.11 Sefasə yà jə yırı don, ba nə boŋə Piyerə.

fwa ndə liù tə nə, ʋ nə tà Zwifə yəbə. N wà n tián ma fwa ndə Zwifə nə. Bèèèe dàń nə pɪn, síún nə, n dàń ma pìà, sə n kálú lià tə, ba nə tà Zwifə-ba, n pa, ba ya ndə Zwifə-ba nə?»

*Zwifə-ba də lià tə, ba nə tà Zwifə-ba mɛ, sə ba kə ba waa Zwezi-Kərisə nə  
(Galasi tián 5.1-6)*

<sup>15</sup> Nə mù yɪ \*Zwifə-ba nə ɓɪɪ nəba, nə tà dʷíá tə, ba nə yèrì Yɪ \*nii tə, ʋ nə pɪn \*Moyizə nə. <sup>16</sup> Də ku nətʋ mɛ, nə tə yèé də, liù mɛ, sə ʋ kə ʋ waa Zwezi-\*Kərisə nə, sə ʋ ma ya cígá tíú Yɪ yáá con. Ku tà liù tə, ʋ nə twá Yɪ nii tə nə, ʋ nə pɪn Moyizə nə, nə wá ya cígá tíú Yɪ yáá con. Nə də tətə yɪ nə ken nə waa Zwezi-Kərisə nə, sə Yɪ wàní ʋ jələ nəba ndə lià tə nə, ba nə yɪ cígá tián ʋ mù Yɪ yáá con. Liù mama wàrì Yɪ nii tə, ʋ nə pɪn Moyizə nə, ʋ zílí, sə ku pɪn, Yɪ jələ wá ndə cígá tíú nə ʋ yáá con. <sup>17</sup> Nə mù Zwifə-ba pìà, sə nə ya cígá tián Yɪ yáá con, nə nə ken nə waa Zwezi-Kərisə nə yɪɪ. Yá Yɪ dàń nə twá ku nətʋ wa, ʋ ɓɪɪ nəba də, nə yɪ cuna lià, ba nə ba Yɪ nii tə, ʋ nə pɪn Moyizə nə twá, ku nətʋ pìà ku ɓɪɪ bèèèe? Ku pìà ku ɓɪɪ də, ku yɪ Zwezi-Kərisə nə ken nəba cuna tə wə naaa? Abada! Ku tà nətʋ! <sup>18</sup> Də à mù nə pìà à twá Yɪ nii tə nə, ʋ nə pɪn Moyizə nə, à yá nə vɪga, sə à twá ku nə, ku ɓɪɪ də, à tɔŋa cuna Yɪ yáá con. <sup>19</sup> Yɪ nii tə tətə, ʋ nə pɪn Moyizə nə, pɪn à tɪ. Yá Yɪ nii təntə kúù ba dián jə à yuu wa, ku nətʋ dàń ga wá pa, à ya mɪ wa, à pa Yɪ nə. <sup>20</sup> À dàń yɪ ndə ba paa à mù də Zwezi-Kərisə mɛ dagarʋ tə yuu wa. Yá ku kúù tà à tətə nə wulə, ku dàń yɪ

Zwezi-Kərisə mu tə nə wulə à waa. À mu tə, à dān nə jə wulə luv wa, ku yi à ken à waa Yu-Biu tə nə, à ma wulə. U mù nə sóní nə, v ga sèe, v tu à yuu yiri. <sup>21</sup> À ba pìà, sə Yu pubwanv tə, v nə fwa à yira, ya ndə tutv nə. Də liù nə wàá Yu nii tə nə, v nə pɪn Moyizə nə, v twá, ku pɪn Yu jələ wá ndə liù tə nə, v nə yi cígá tíú v mù Yu yáá con, Zwezi-Kərisə yi v tɪga tutv.

### 3

*Yu nii tə, v nə pɪn Moyizə nə, də liù nə ken v waa Zwezi-Kərisə nə yoo*

*(Galasi tián 4.9-20; Romə tián 8.14-17)*

<sup>1</sup> Á mù Galasi tián-ba, bèèèe nə pɪn, á yi ləyərən nətən? Wàà nə gɪgarɪ aba v dɔgv? À bɪrɪ aba zəni zəni, nətə Zwezi-\*Kərisə nə tɪga dagarv tə yuu wa. <sup>2</sup> À dān bwe aba yoo nədv ku tə, sə á le nə. Yu nə pɪn aba v \*Siɲu tə, ku yi á nə zilí v \*nii tə, v nə pɪn \*Moyizə nə, yiri naaa? Yu pɪn aba v Siɲu tə, á nə cɔgv Zwezi-Kərisə suywáɲú tə, á ga kə á waa v nə yiri. <sup>3</sup> Bèèèe dān nə pɪn, á yi ləyərən nətən? Ku jɪjv tə nə, Yu-Siɲu tə yà nə yi á diàn. Bèèèe dān nə pɪn, á ma pìí á jələ á tətə diàn yuu wa síún nə? <sup>4</sup> Á nɪ yìèn kapɔv, tə nə tun, ku ga yi ndə tutv nə á mù con nə. Tə yìèn təntə yi tutv, naaa? <sup>5</sup> Yu nə pɪn aba v Siɲu tə. U mù ga nə fwa yomulan á tətəɲi wa. Ku yi á nə zilí v nii tə, v nə pɪn Moyizə nə, yiri naaa? Nə à yèə ku yi, á nə cɔga Zwezi-Kərisə suywáɲú tə, á ga kəni á waa v nə yiri?

*Abərahəmə ken v waa Yu nə*



6 Ku púpúní Yü sagi tē wa, ku wú: «\*Abərahāmə ken ʋ waa Yü nə, ku pa Yü jələ wá, ndə liù tē nə, ʋ nə yi cígá tíú, ʋ mù Yü yáá con». 7 Ku nətv dān pià ku biri aba də, ku yi lià tē, ba nə ken ba waa Yü nə, nə yi Abərahāmə bia cígá cígá. 8 Ku púpúní Yü sagi tē wa fuən fuən də, mánjá wá bà, lià tē, ba nə tà \*Zwifə-ba, wá kə ba waa Yü nə. Yá Yü dān wá jələ ba, ndə lià tē nə, ba nə yi cígá tián ʋ mù Yü yáá con. Ku mù yiri, Yü dí yáá ʋ swìn sɔywanjú tē, ʋ biri Abərahāmə, ʋ wú: «À wá fwa pubwanv dwíó tē mama yira, ba nə tà Zwifə-ba, lɔv mama wa, n mù yiri». 9 Ku mù dān nə wá pa, lià tē mama, ba nə ken ba waa Yü nə, ʋ wá fwa pubwanv ba yira, ndə ʋ nə fwa pubwanv Abərahāmə yira, ʋ nə ken ʋ waa ʋ mù Yü nə.

10 Yü wá cùgù lià tē mama, ba nə buŋa də, ba wáá ʋ mù Yü \*nii tē, ʋ nə pin \*Moyizə nə, ba zilí, ba ma yanɩ cígá tián ʋ yáá con. Ku púpúní Yü sagi tē wa, ku wú: «Liù tē, ʋ nə wà Yü nii tē, ʋ nə pin Moyizə nə, mama zilí mánjá mama wuuu, Yü wá cùgù ku tíú». 11 Nə yèó də, liù mama wàri ʋ yanɩ cígá tíú Yü yáá con, ʋ nə zilí Yü nii tē, ʋ nə pin Moyizə nə, zəni yiri. Nə ni, ku nə púpúní Yü sagi tē wa, ku wú: «Liù tē, ʋ nə ken ʋ waa Yü nə, mə ʋ mù nə yi cígá tíú Yü yáá con. Yá ku mù nə wá pa, ʋ na cígá cígá mu». 12 Liù tē, ʋ nə zilí Yü nii tē, ʋ nə pin Moyizə nə, ku tà ʋ ken ʋ waa Yü nə. Ku púpúní Yü sagi tē wa, ku wú: «Liù tē, ʋ nə twá Yü nii tē nə, ʋ nə pin Moyizə nə, ʋ wá na cígá cígá mu». 13 Yá Zwezi-Kərisə dān nə yè nəba, ʋ jon Yü nii tē, ʋ nə pin Moyizə

nə, ku yà nə wá cùgè nəba, tə jun wa. Mə v m̀̀dàn nə pìí v jon nə yuu cɔna tə v zɪn. Ku púpúní Yı sagı tə wa, ku wó: «Yı wá cùgè liù tə, ba nə kuru ba goli tìú yuu wa». <sup>14</sup> Mə Zwezi-Kərisə tıga nətɔ, sə là tə, ba nə tà Zwifə-ba, də wàní ba na pubwanɔ tə, Yı nə kàn nii də, v wá fwa Abərahame yıra. Yá nə d̀̀dàn nə ken nə waa Zwezi-Kərisə nə, nə wá na Yı-\*Siɲu tə, Yı nə kàn nii, sə v pa nəba.

*Yı nii tə, v nə pɪn Moyizə nə, ba v nikanı tə yáá nə cì*

*(Matıə 7.20; Romə tián 4.13-17; 10.4-13; Efezə tián 3.6)*

<sup>15</sup> À nubıa-ba, à pìà à tì tia yuu yoo ku tə, à ma bıɪ aba yoo. Də là bələ nə ken nii nədɔ, ba ga kàn nii, ba pa duən nə won yuu wa, liù don mama wàrì ba nımarɔ təntə v cùgà. Yá liù mama ga wàrì yoo v sùrí ku nə də. <sup>16</sup> Mə Yı \*nımarɔ nikanı tə də yı nətɔ. Yı kàn nii, v pa Abərahame də v bıú tə nə, v nə wá lɔrı. Yı wà swɪn, v wó, Abərahame də v bıa tə, v nə wá lɔrı, sə ku d̀̀dàn ká ya ndə ku yı v bıa tə mama. Bıú təntə nə yı \*Kərisə. <sup>17</sup> Á nəɲə yoo tə, à nə pìà, sə à swɪn. Yı jun nımarɔ də Abərahame, v ga kàn nii də wá. Ku bına bıəntıa də fıtwá (430) kwa nə Yı d̀̀dàn pɪn v \*nii tə \*Moyizə nə. Yá v nii təntə kúò wàrì v nımarɔ tə ku cùgà. Ku yà nə wàá ku cùgà v nii tə, v nə kàn də Abərahame, yà wàrì ku jì. <sup>18</sup> Də ku nə yı liù nə zılí Yı nii tə, v nə pɪn Moyizə nə, nə wá pa, v na torı Yı con, ku kúò tà Yı nikanı tə yıɪ. Yá Yı ga fwa zəni Abərahame yıra, v yà nə kàn nii də wá yıɪ.

19 Bèèèe yiri Yü dàn ma pa v nii tē Moyizē nē? Yü pün wá v nii tē, sē ku pa, nē lwarí yoo tē, ku nē yi cuna v yáá con. Yá Yü nii tēntē dàn yà mē, sē ku ya lá wuuu, ku ja vèli máná tē wa, Abərahāmē biú tē nē wá bà. Mē v mù biú tēntē nē, Yü yà pün v nikaní tē. Yü nii tēntē yi \*malike nē ja ku, tē bà, yá bæε\* dàn ga ya tē mù dē ləzoni pwərə wa, v jon ku, v swìn, v bırı ləzoni nē. 20 Dē liù nē wulə lià bələ pwərə wa, ku pià ku bırı dē, ku tà ba ladva cıci yiri. Yá Yü nikaní tē mù ga yi v cıci yoo. 21 Ku nətü dàn yi ku bırı dē, Yü nii tē, v nē pün Moyizē nē, dē Yü nikaní tē zıga duən nē naaa? Abada! Ku tà nətü. Dē Yü yà nē pün nii, ku nē wáá mü ku pün ləzoni nē, ba yà wá twá nii tēntē nē, ba jì cıgá tián Yü yáá con. 22 Ku swìn Yü sagı tē wa dē, ləzoni tē mama yi ba wulə cuna wa wuuu. Mē ku mù nē pün, Yü nikaní tē nii mē, sē ku sú, ku pa lià tē mama nē, ba nē ken ba waa Zwezi-Kərisē nē.

23 Dē máná tē nē wà yí, sē nē kē nē waa Zwezi-Kərisē nē, Yü nii tē, v nē pün Moyizē nē, yà pün, nē jì ndē bán diè lià nē. Yá nē dàn yà dànì dē, Yü bırı nəba, sē nē kē nē waa v nē. 24 Yü nii tē, v nē pün Moyizē nē, yà kəni nəba cwəŋə wa máná mama wuuu, ku va ku yí máná tē, Zwezi-Kərisē nē twi, sē nē kē nē waa v nē, sē ku pa nē ya cıgá tián Yü yáá con. 25 Yá máná dàn nē yí, sē nē ken nē waa Yü nē, nē kúbè tà Yü nii tē, v nē pün Moyizē nē, jun wa nē nē wulə. 26 Cıgá, á nē ken á waa Zwezi-Kərisē nē, ku pün á mama jì Yü bıa. 27 Á liù tē mama, ba nē ləgə níá wa, ku twá

\* 3:19 3.19 Bèè tēntē, v nē yin Yü dē ləzoni pwərə wa, nē yi Moyizē.

də Yü yiri tə, ɔ wulə mü wa də Zwezi-Kərisə, yá ɔ ga nyin də wá də. <sup>28</sup> Pwɪa dàń kùè tɛ̀lé \*Zwifə-ba də \*Gərekə-ba pwərə wa. Pwɪa kùè tɛ̀lé ywəŋə də lià tə, ba nə ti ba tiàn, pwərə wa. Pwɪa kùè tɛ̀lé bara də kana pwərə wa. Kɔ nətɔ dàń pià kɔ biri də, á mama də Zwezi-Kərisə vwə duən nə, á dàń ga yi won nədu. <sup>29</sup> Yá də á nə yi Zwezi-Kərisə nə ti aba, á yi Abərahəmə dwíi tə wa lià. Á yi lià tə, á nə jə tori Yü nikanɪ tə wa, ɔ nə kàn nii, sə ɔ pa Abərahəmə nián nə.

## 4

*(Romə tián 8.14-17)*

<sup>1</sup> Á nəŋə kɔ tə, à nə pià à swìn yəbə nə yi nətɔ. Kɔ yi ndə bisɪmaa nə mə, sə ɔ zàn ɔ tɪni ɔ nyɪna wiən nətɔ. Máná tə wa, ɔ tə nə yi nəmaa, ɔ yi ndə yonɔ nə. Yá ɔ mù ga nə mə, sə ɔ tɪni ɔ nyɪna tə wiən tə mama. <sup>2</sup> U bisíní nə, ɔ yi ɔ wulə lià duən jìàn wa, ba ywàŋá ɔ də ɔ wiən tə yuu, kɔ ja vələ máná tə, ɔ nyɪna tə nə li ɔ tún. <sup>3</sup> Mə kɔ yi nətɔ nə də con. Máná tə, nə yà nə yèrì Yü yìèn tə, nə yà yi ndə bisíná nə, yá lɔɔ wiən yà jə diàn nə yuu wa, ndə tə ywəŋə nə. <sup>4</sup> Máná tə, Yü nə li ɔ tún, dàń nə yí, ɔ tɪn ɔ biú Zwezi tə lɔɔ wa. Yü pɪn, kan lɔɔ wá, ɔ ga twá \*nii tə nə, Yü nə pɪn \*Moyizə nə. <sup>5</sup> U twi, sə ɔ pa lià tə, ba nə twá Yü nii tə nə, ɔ nə pɪn Moyizə nə, tɪni ba tiàn, sə nə ga jì ɔ mù Yü bia. <sup>6</sup> Á nəŋə, kɔ tə nə biri də, nə yi Yü bia. Yü tɪn ɔ biú tə \*Siŋu ɔ pa kɔ bà, kɔ zɔ nə pubɔŋa wa. Mə Siŋu tɛ̀ntə dàń nə pɪn, nə wàá nə swìn, nə wú: «Baba! Nə nyɪna Yü!» <sup>7</sup> Kɔ nətɔ dàń biri də, n kùè tà yonɔ,

n yí Yí biú. Yá v dǎn wá pa mú tori tē, v yà nē tani, sē v pa mú, n nē yí v biú tē yí. Yí tētē nē tǎnǎ zēni tētē.

*(Galasi tián 3.1-4; 5.1-12)*

<sup>8</sup> Mǎnǎ don yin lá, á yà wà Yí lwarí. Á yà ga jùnì wiēn duēn, tē nē tà Yí cígá cígá. <sup>9</sup> Yá síún nē, á dǎn lwarí Yí. Kú tē nē dwē, Yí dǎn yèé á yoo. Kú dǎn fwa nētē, á ma píí á twá luv wiēn tē kwa, tē nē ba diàn jē míámíán? Bèèèè nē pín á ma pià, sē tē mù wiēn tētē kùb píí tē tǐnì aba ndē ywēnē nē? <sup>10</sup> Á kùb píí á zílì diàn duēn, nē à yèé cǎnì duēn, nē à yèé bǐna duēn. <sup>11</sup> Á yoo tē jē pucvni kú pa nē, à tǔtǔncaran tē, à nē tǔn à pa aba, nē wá jì tǔtǔ yí.

<sup>12</sup> À nubǎ-ba, à lòrì aba, sē á ya ndē à nē, à dē nē yí ndē á nē yí. Á wà lwaní mama fwa à yíra.

<sup>13</sup> Á yèé dē, à dí yáá nē twí á con, kú yí à yayǐgǔ tē nē pín, à ya á con, à ma swìn Zwezi-Kerisē suywǎnǔ tē, à bǐrì aba. <sup>14</sup> À yayǐgǔ yin cǎn kú pa aba. Yá dē kú nētǔ mama, á wà nē zǔnì, sē á dǐnǐ nē, á kē vǎn nē. Á tē sēè, á jon nē, á kē á con ndē Yí \*malíka nē, nē à yèé ndē Zwezi-Kerisē tētē nē. <sup>15</sup> Kú mǎnǎ tētē wa, á pwíí yà poli zēnzēn. Bèèèè dǎn nē pín, á kùb tǐlé pupwēn tētē wa síún? À yēni dē, á yà nē wàá á yíá á lí, á kēni à yíá tē nē, á yà nē lí tē á kē lá. <sup>16</sup> Yá síún nē, à dǎn jigē á dǔnǔ, cígá tē yí, à nē swìn á con naaa? <sup>17</sup> Líà wulē á nii nē dē yawala. Yá ba yawala tētē ba zīēn. Ba yí ba pià, sē ba pwēè á mù dē à mù Polē duēn nē, sē á ja yawala dē

ba mù. <sup>18</sup> Ku zìen, sè á ja yawala dè yoo tē, ku nè zìen, mánǎ mama wuu. Ku tà mánǎ tē, à nè wulè á con cici. <sup>19</sup> À bia-ba, á yoo kùù pìi ku yì nè, ndè kapuè pùé nè yàá yì nètɔ, ɔ lɔrɪ mánǎ wa. Ku wá yì nè nètɔ mánǎ mama wuu, ku ja vèli mánǎ tē wa, á nè wá jì ndè Zwezi-Kèrisè nè. <sup>20</sup> À swè dè, à yà nè wulè á tètɛɲi wa, mánǎ ku tē wa, sè à swìn sùràn duèn á con, tē nè wulè à bican wa. Ku nè tà nètɔ, à mù kùù yèrì ku tē, à nè wá swìn á con.

*Sara dè Agarè yoo  
(Ebèrè-ba 12.18-24)*

<sup>21</sup> Á mù là tē, á nè pìà, sè á twá Yɪ \*nii tē nè, ɔ nè pɪn \*Moyizè nè, á swìán yoo ku tē, á bɪrɪ nè. Á wà ku tē, Yɪ nii tē nè bɪrɪ, nì naaa? <sup>22</sup> Ku púpúní Yɪ sagɪ tē wa dè, \*Abèrahame lɔrɪ bia bèle. ɔ mù dè Agarè nè lɔrɪ bìú tē don, ɔ mù dè Sara ga lɔrɪ ɔ don tē dè. Agarè yà yɪ yonɔ, yá Sara mù yà tà yonɔ. <sup>23</sup> Bìú tē, Abèrahame dè yonɔ tē nè lɔrɪ duèn nè, yɪ ku twá dè lèzwènè pùé fira. Yá bìú tē, ɔ mù dè kan tē, ɔ nè tà yonɔ tē, nè lɔrɪ duèn nè, yɪ ku twá dè Yɪ nikanɪ tē. <sup>24</sup> Yìèn tɛntè tun, sè tē bɪrɪ nèba yoo ku tē. Ku mù kana bèle tɛntè yɪ ndè Yɪ \*nimarɔ bèle tē nè, ɔ nè kàn dè ɔ là tē. Yonɔ Agarè yɪ Yɪ nimarɔ tē, ɔ nè tún dè Moyizè \*Sinayi paan tē yuu, ɔ ga yɪ ywɛɲè ɔ lɔrɪ. <sup>25</sup> Agarè dàn yɪ ndè Sinayi paan tē nè, ku nè wulè Arabi nagwanaa wa. Vàn don dè nè, ɔ mù nè yɪ ndè \*Zwerizalemè tē nè, ku nè wulè tia yuu zèn. Ku tiv tɛntè là tē mama yɪ ywɛɲè. <sup>26</sup> Yá Zwerizalemè tē, ku nè wulè Yɪ sàń nè, yɪ

ndə kan tə nə, v nə tà yonju. Mə v mù nə yɪ nə nuu. <sup>27</sup> Kɔ púpúní Yɪ sagɪ tə wa, kɔ wú:

«Kan tə, v barɪ nə dɔgɔ wá, lɔrɪ bia, v doni kan tə, v nə wulə v barɪ con. Kɔ mù nə pɪn, n mù kan tə, n ba biú lɔrɪ, n tə mɛ, sə n kə n tián pupwən wa, n ga mun n kə yɪ nə, də n nə yèrì biú lɔrɪ nə yì nətɔ tə mɛ».

<sup>28</sup> À nubɪa-ba, á yɪ Yɪ bia cígá cígá. Yɪ nə kàn nii təntə. Á yɪ ndə \*Yɪzakə nə, Yɪ nə kàn nii də Abərahámə də, v wá lɔrɪ wá. <sup>29</sup> Abərahámə máǵá tə wa, v biú tə, v nə lɔrɪ də ləzwənə pùé fɪra tə, yà kəni càn biú tə nə, Yɪ-\*Sɪŋu tə nə pɪn, v lɔrɪ. Də zèn mama, kɔ yoo təntə tə tɔŋa nətɔ. <sup>30</sup> Yá kɔ dàń púpúní Yɪ sagɪ tə wa, kɔ wú: «Dɪŋɪ yonkan tə də v biú tə, n pa ba vìí, v nə wà mɛ, sə v tì biú tori n con tə yɪrɪ. Kɔ yɪ kan tə, v nə tà yonju tə, biú nə mɛ, sə v tì biú tori təntə!» <sup>31</sup> À nubɪa-ba, kɔ mù nə pɪn, nə mù tà yonkan tə bia, nə dàń yɪ kan tə, v nə tà yonju, bia.

## 5

### *Zwezi-Kərisə pɪn, nə tɪ nə tián (Galasi tián 2.3-5; 3.1-7)*

<sup>1</sup> Zwezi-\*Kərisə van nəba v jon, sə nə wàní nə tɪnɪ nə tián cígá cígá. Á dàń kənə dɪàn, sə á tɪnɪ á tián máǵá mama wuu. Á kúv dàná ká sèe, sə á pɪí á jì ywəŋə yoo mama wa.

<sup>2</sup> À mù Polə swìn á con də, á nəŋə á nə pɪn, ba \*gwəŋə á bara Yɪ \*nii tə yɪrɪ, v nə pɪn \*Moyizə nə, á nə keni á waa Zwezi-Kərisə nə tə, kúv ba dèń jə. <sup>3</sup> À tə kúv pɪí à líí aba də, liú tə mama,

v nə pɪn, ba gwəŋə wá, ku mɛ, sə v zìlí Yɪ nii  
 tə mama, v nə pɪn Moyizə nə. <sup>4</sup> Á mù là tə, á  
 nə buŋa də, á wá ya cígá tián Yɪ yáá con, á nə  
 zìlí v nii tə, v nə pɪn Moyizə nə yɪrɪ, á mù də  
 Zwezi-Kərisə wá pwèe duən nə, yá Yɪ kùd wàrì  
 v pubwanv tə, v fwa á yɪra. <sup>5</sup> Nə mù con, nə ja  
 yala də, Yɪ wá sèe nəba ndə là tə nə, ba nə yɪ  
 cígá tián v yáá con. Nə keni nə waa Zwezi-Kərisə  
 nə wuuu, yá Yɪ-\*Siŋu tə dān pɪn nəba dīàn, nə  
 ma dānì ku nətɔ tə. <sup>6</sup> Liù tə, v də Zwezi-Kərisə  
 nə vwə duən nə, ba nə gwəŋə ku tíú, nə à yèé ba  
 nə wà wá gwəŋə, tə mama yɪ tutɔ. Yoo tə, ku nə  
 dé lá, ku mù nə yɪ, sə v kəni v waa Zwezi-Kərisə  
 nə wuuu, sə v sóní v duən tə.

<sup>7</sup> Dí yáá nə, á yà vəli á yáá wuuu. Síún nə, wàà  
 dān nə cìgà á yáá nə, v pa, á kùd ba cígá tə nə  
 twá? <sup>8</sup> Ku tà Yɪ tə, v nə kúrí aba, sə á ya v mù  
 là, nə pɪn aba ku pubuŋa təntə. <sup>9</sup> Á nəŋə won  
 tə, ku nə nyɪn də á yoo təntə. Ku yɪ ndə sabwarɪ  
 mancɪn nə yáá pa dipen mun mama zàn tə ŋònì.  
<sup>10</sup> À mù də á mù mɛ yɪ \*Yuu-Tiu nə tɪ nəba. Ku  
 mù nə pɪn, à pùé ba cùgà də á yoo. À yèé də, nə  
 mɛ pubuŋa wá bà ku ya nədɔ. Yá Yɪ wá b̀r̀r̀i liù  
 tə, v nə gugurə aba nətɔ tə, b̀r̀rà, sə v cùg̀ wá,  
 də ku tíú nə swə v yɪ nətɔ mama. <sup>11</sup> À nubɪa-ba,  
 á yèé cígá mama də, à mù kùd ba kàr̀ à b̀r̀r̀i là  
 nə, sə ba gwəŋə ba, sə ba ma wàní ba ya cígá  
 tián Yɪ yáá con. Ku yà nə yɪ nətɔ, à kàr̀ à b̀r̀r̀i,  
 \*Zwifə-ba yà kùd bá kə nə càn wa. Yá à dān nə  
 swɪn à b̀r̀r̀i də, Zwezi-Kərisə nə tɪga dagarv tə  
 yuu wa, yà kùd bá ya tɪran, ku pa liù mama nə.



<sup>12</sup> À mù waa con, à yà swə, sə bara tə, ba nə gugurə aba də bæe goŋu tə, yà gwəŋə ba pəne tə tətə míámíán, ba li, sə ba ga yá aba.

*Á yá, sə Yü-Siŋu tə kə aba cwəŋə wa  
(Romə tián 8.1-14; 13.12-14; Kolosə tián 3.5-15)*

<sup>13</sup> À nubia-ba, á mù con, Yü kúrí aba v li, sə v pa á tɪnɪ á tián. Yá á nə tɪ á tián tə yɪɪ, á dàná ká búń də, á mɛ, sə á fwa á pùé fɪra yìèn tə. Kɪ tə, á nə mɛ, sə á fwa, á mɛ, sə á sóní duən, sə á tɪn á pa duən nə, ndə ywəŋə nə. <sup>14</sup> Də liù nə zìlí yü \*nii tə, v nə pɪn \*Moyizə nə, v wú: «Sóní n don, ndə n tətə nə», kɪ tíú zìlí Yü nii tə yìèn tə mama nii. <sup>15</sup> Yá á dàń nə ba yoo təntə fwa, á nə pìí á dɪŋɪ duən, á vuri ndə ganaŋa nə, á mɛ, sə á zùrì á yira. Á wá cùgù duən míámíán.

<sup>16</sup> Kɪ mù nə pɪn, à dàń swìn á con, sə á yá, sə Yü-\*Siŋu tə kə aba cwəŋə wa. Yü-Siŋu tə nə kəni aba cwəŋə wa, á ba fwa á pùé fɪra yokukwɪnan tə. <sup>17</sup> Ləzwəŋə pùé fɪra yìèn tə yɪ tə zɪga Yü-Siŋu tə fɪra yìèn tə nə. Yá Yü-Siŋu tə də fɪra yìèn tə yɪ tə zɪga nə pùé fɪra yìèn tə nə. Tə yìèn bələ təntə dàń yɪ tə zɪga duən nə. Kɪ mù dàń nə pɪn, á kùù wàrɪ yìèn tə, á nə swə, á fwa. <sup>18</sup> Də kɪ nə yɪ Yü-Siŋu tə nə kəni aba cwəŋə wa, Yü nii tə, v nə pɪn Moyizə nə, kùù ba dián ja á yuu wa.

<sup>19</sup> Á nəŋə, ləzoni fɪra yìèn tə, ba nə swə, sə ba fwa: Ba swə, sə ba pəni duən vɛɛ vɛɛ. Ba swə, sə ba tɪn durən yìèn. Ba swə, sə ba wàní ba fwa yokukwɪnan tə mama, ba nə swə. <sup>20</sup> Ba pɪn dun wəŋwanan nə, ba ga dɔgɔ Yü vàn nə. Ba tɪŋa

ciri yìèn. Ba liù mama yi v don duḡv. Ba di jara dè duèn. Ba ja wɔgwɔv dè duèn. Ba ja lɔja zənzən. Ba liù mama swə, sə v jigi dè v don. Ba swə, sə ba pwèe dè duèn. Ba liù mama nii yi ku cici. <sup>21</sup> Ba swə ka zigi là duèn nè, ku tián wiən yiri. Ba swə, sə ba nyu swana, ba bubuni. Ba swə, sə ba dé wodirən zənzən duèn nè, dè ba tuni. Ba swə, sə ba tun yìèn yiri mama, tə nè yi ndə yìèn təntə nè. À dān pìà, sə à swìn ku á con, ndə à nè dí yáá à swìn ku nətɔ. Là tə mama, ba nè tɔja tə mù yìèn təntə bá na ba tori Yu sàń tə wa.

<sup>22</sup> Á nəḡə wiən tə, Yu-Siḡu tə nè pɪn liù nè, ndə tìv nè zɪja ku bia nətɔ. Yu-Siḡu tə yàá pa là swə duèn. Ku yàá pɪn pupwən là nè. Ku yàá kə bɪcanɪ sié là wa. Ku yàá pa pínú là nè. Ku yàá pa, là jì wɔywanɪna duèn nè. Ku yàá pa, là tɔja ba pɪn duèn nè dè wɔywanɪv. Ku yàá pa, là twá cígá tə nè, ndə ku nè mɛ nətɔ. Ku yàá pa, là yi bwàbwà. Ku yàá pa, là yèó ba tián janv. <sup>23</sup> Yu nii tə, v nè pɪn Moyizə nè, ba yìèn təntə nè ziga. <sup>24</sup> Là tə mama, ba nè yi Zwezi-\*Kerisə nè ti ba, ba dɔḡv ba pùé fira yokukwɪnan tə mama, ndə ba paa tə dagarv yuu, sə tə cùgò. <sup>25</sup> Yu-Siḡu tə nè pɪn, nè wulə mu wa. Nə dān yá nè tián nè pa Yu-Siḡu tə nè, sə ku kə nèba cwəḡə wa.

<sup>26</sup> Nə dānà ká pa, nè jì fwiə là, nè ma pìà duèn nii nè, nè ga ziga là duèn nè ku tián wiən yiri.

## 6

(Romə tián 2.3-11; Ebərə-ba 6.10-12; 2 Korəntə tián 9.6)

<sup>1</sup> À nubia-ba, á mù yi là tè, á nè zìlí Yü-Sinju tè nii. Á dàn nè ni liù dè v wulə v tɔŋa tɔtɔnkɔkwɔɔn, á mɛ, sɛ á san ku tíú nè dè bɪcabwanɔ, sɛ v pìí v bà cígá cwəŋə tɛ wa. Yá à dàn swìn á liù mama con, sɛ v cì v tiàn nè zəni, \*Sɪtana dàn ká dédén, sɛ v yigu v dè tətə, v pa v tɔn yokɔkwɔɔn. <sup>2</sup> Á saŋa duən nè, á zɪn duən yun zɪla. Á nè fwa nətɔ, á wá zìlí Zwezi-Kərisə nii tè, v nè swìn á con.

<sup>3</sup> Də liù nè buŋa də, v yi zənzən, yá v ga tà won mama, ku yi v tiàn v gɪgarɪ. <sup>4</sup> Liù mama dàn mɛ, sɛ v ywán v tətə tɔtɔnɛ tɛ, v jón tɛ zɪn naaa? Də tɛ nè zɪn, tɛ mù nè mɛ, sɛ tɛ pa v jwɛ. Ku tà v nè pìà, sɛ v ja v tiàn, v ma man də liù don nè wá pa, v jwɛ. <sup>5</sup> Ku pìà ku bɪrɪ də, liù mama tɔtɔŋɪ yi n yuu zɪlɪ.

<sup>6</sup> Liù tè, v nè yi liù don nè swìn Yü sugv tè, v bɪrɪ wá, v mɛ, sɛ v pa v jɪjə tɛ vàn don ku tíú nè.

<sup>7</sup> Á dànà ká gɪgarɪ á tiàn. Liù mama wàrɪ Yü v kɔkɔlɪ. Won tè, ləzwənə nè dùè, mɛ ku mù nè, v wá za. <sup>8</sup> Liù nè fwa v pùé fɪra yokɔkwɔɔn, ku yi ndə wiən nè, v dwì. Yá ku tè, v nè wá za, ku yi v wá cùgè míámíán. Liù tè, v də nè kúb yi Yü-Sinju tè nè, kəni cwəŋə wa, v də yi ndə wiən nè, v dwì. Yá ku tè, v də nè wá za, ku wá pa, v na mu, ku nè ba zwèe Yü con. <sup>9</sup> Nə tɔŋa zəni máŋá mama wuu, nè dàn ká gwàrɪ. Máŋá nəzəŋu biàn, nè nè wá na wozəŋu də, nè nè jɪn nətɔ, nè ja va, nè yí ku yígúré wa. <sup>10</sup> Ku mù yɪrɪ síún nè, nè tɛ nè jə máŋá, sɛ nè ma tɔn, nè dàn tɔŋa zəni là tè mama yɪra. Ku tè nè dwə, nè

tɔŋa zəni zənzən lià tə yɪra, ba də nə ken ba waa Zwezi-Kərisə nə, ndə nə də nə.

*Sagɪ tə yígúré sùràn  
(Filipə tián 3.2-11)*

<sup>11</sup> Á dàn ywàŋá púpúná nəfaran tətə. Tə yɪ à mù Polə tətə nə púpúní tə, də à tətə juɪ. <sup>12</sup> Lià duən wulə, ba yɪa nə yɪ, sə lià bu ba nə, sə ku bɪri də, ba mù nə ziən. Mə ba mù nə swìn á con, ba ga pià ba kálú aba, sə á \*gwəŋə aba. Ba tɔŋa ku nətu tə, sə lià dàn ká kə càn ba nə. Ba yèə də, ba nə kàrì də, Zwezi-\*Kərisə tɪga dagarv tə yuu wa ba cuna yɪri, lià wá kə càn ba nə. <sup>13</sup> Ba mù lià təntə tətə, ba nə gwəŋə ba, ba Yɪ \*nii tə, v nə pɪn \*Moyizə nə, mɛ zìlí. Ku yɪ ba pià, sə á gwəŋə aba, sə ba twá ku nə ba fwa fwiə. <sup>14</sup> À mù fwa fwiə də yoo nədu cɪcɪ. Ku mù nə yɪ, nə \*Yuu-Tiu Zwezi-Kərisə nə tɪga dagarv tə yuu wa. U nə tɪga dagarv tə yuu wa yɪri, tɪa ka tə yuu wiən tə yɪ ndə tə tɪga à yáá con. À də ga yɪ ndə à tɪga tə wiən tə yáá con. <sup>15</sup> Bɛɛ nə gwəŋə, nə à yèə v wà gwəŋə, ku nədu mama ba dèŋ ja. Yoo tə ku nə dɔ́ lá, ku mù nə yɪ, sə Yɪ pa nəba mu nəduɪn tə. <sup>16</sup> Yɪ nə wá pa bɪcàn sié, v ga dəri lià tə mama yinəgə zənzən, ba nə wulə cwəŋə nəduɪn təntə wa, də \*Yɪzərayelə dwíí tə mama, ku nə yɪ v mù Yɪ nə tɪ.

<sup>17</sup> Ku nə zɪgɪ zèn, liù mama kúò dàn ká wɔwɔlɪ nə. À yɪra jə cwara, tə nə bɪri də, à dí càn Zwezi-Kərisə yɪri. <sup>18</sup> À nubɪa-ba, nə Yuu-Tiu Zwezi-Kərisə nə wá fwa v pubwanv tə á pubɔŋa wa. Amɪna!

**Yu soywánó sagı**  
**Nuni, Southern: Yu soywánó sagı New Testament**  
**Le Nouveau Testament en Nun**

copyright © 1999 Wycliffe Bible Translators, Inc.

Language: Nuni, Southern

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 21 Feb 2024 from source  
files dated 29 Jan 2022

d18530a7-7259-5f23-92b6-70e3abe5f3fa